

1623 eco



LECONOME

Fidelle.

AV ROY.

to

M. DC. XXIII.

Case

1

39

326


1623800

RECORDS

FILE

THE NEWBERRY
LIBRARY

1893



L'OE CONOME FIDELLE.

AV ROY.



IRE,

Vostre Majesté a peu recognoistre iusques icy, combien la Monarchie est onereuse, & plaine de trauerfes, c'est vn tiltre imperieux à la verité, mais qui porte avec luy vne infinité de peines, qui le rendent moins absolu. L'antiquité pour nous faire voir cōbien la dignité de Roy estoit sujete aux accidents de la fatalité, & à la calamité des miseres du monde, la representoient sur vn theatre enrichi de delices & plaisirs, mais aussi tout entouré d'ennuis, de peines, de trauaux, d'afflictions, de crainte, d'apprehēſion, & des aduersitez qui d'or-

dinaire se rencontrent entre le chef & la Couronne: Aussi est-il bien veritable que le Prince qui est appellé au gouuernemēt d'une Monarchie, est subiect à beaucoup de reuers de fortune, & doit bien iudicieusement preuoir à son estat pour l'entretenir & contenir au peried d'un ordre bien policé: Car le Roy est le souuerain Seigneur qui doit continuellement veiller pour la conseruation des peuples que le Ciel luy a commis en charge, & rechercher & pourchasser le salut de ses subjets, puisque la gloire de son regne despend immediatement de la prosperité de son Royaume. Tout procede de son autorité, l'honneur, la gloire, la louange, le triomphe, & les applaudissements d'une heureuse Royauté; Aussi tout butte & choque le Sceptre de son Empire, le blâme, la mesdisance, le mespris, & la calomnie d'une ialouse enuie. Non, SIRE, que ie vueille dire que vostre Majesté puisse recevoir de telles reproches: Le n'ay autre dessein que vous manifester les pures & bonnes intentions que la nature, le deuoir, la charité, la pieté, m'obligent de

vous représenter en ce petit abrégé que j'ay pensé deuoir & pouuoir legitimemēt offrir à vostre Majesté, pour en iceluy vous faire voir qu'elle est la charge d'une souveraineté Monarchique.

SIRE, trois choses sont grandement nécessaires en vostre Royaume pour le maintenir en la prospérité d'un florissement tousiours égal, & pour empescher que par les troubles & les discordes qui se glissent bien souuēt en vostre republique, il ne tombast en la ruyneuse demolition de son bon establisement: car ce n'est pas tout que d'estre assis sur vn throsne Royal, auoir le sceptre en la main, porter le diadegme sur la teste, commander aux Prouinces, & estre de tous reconnu pour Roy, autres choses sont beaucoup plus desirables & particulieres pour approcher vn souverain Monarque de la perfection, à laquelle il peut aucunement atteindre s'il obserue cecy soigneusement, & qu'il soit desireux de conseruer son Royaume tousiours florissant, & l'augmenter de plus en plus par vn bon gouuernement.

Premierement le Prince que DIEU a

choisi & esleué par dessus les peuples luy donnant la puissance de les regir, & leur commander, doit curieusement prendre garde que rien ne se fasse sur ses terres dõt iln'ait vne cognoissance entiere, & pour se faire fidelement, il doit cognoistre tous les principaux officiers de sa couronne, & ne permettre iamais qu'il soit seruy ou cõduit par des personnes suspectes, & qui n'ont pour but principal que l'aduancement de leur fortune, & non la gloire de son Royaume: Veu que c'est vne impossibilité necessaire que celuy puisse donner bon conseil qui ne tend qu'à l'accroissement de ses biens, de ses dignitez, & de ses grandeurs, ou qui ne vise qu'à son particulier interest, sans auoir égard au bien general du public.

Secondement vn Roy qui desire bien & heureusement regner, doit s'armer de la pieté & de la religion, viure politiquement, aimer & pratiquer les bōnes mœurs & considerer bien que tous les conseils soient premierement rapportez à l'honneur de D I E U, à la conseruation de son Estat, & puis apres au profit & à l'vtilité de

tous ses subjects, qui sont comme les arc-
boutans de son Royaume, & les ressorts
par lesquels se meut toute la Monarchie.
Puis apres il doit diligemment s'enquerir
de tous les deportemens de ses Officiers,
& iusques aux moindres actions d'iceux,
singulierement de celles qui concernent
l'interest de son Estat: A celle fin que ce-
ste cognoissance que le souuerain veut
luy-mesme prendre des affaires publiques
de son Royaume, oblige ses Officiers à
bien & deuëment s'acquitter de leur
charge.

Tiercement, s'il veut viure en bon Roy,
& se conseruer la reputation d'aymer &
cherir la Iustice, il doit estre jaloux de sa
gloire, & auoir la curiosité de prendre luy
mesme quelques certains iours auxquels il
doit generalement faire conuenir tous ses
officiers & soubs-Magistrats, qui là en pre-
sence de sa Majesté rendront vn somma-
ire entier de leur versation chacun en sa
charge, & cela se peut facilement faire par
les certificats, acquits, roolles, taxes,
comptes, distributions, mises, receptes, &
inuentaires generaux, specifiant le bon re-

glement qu'ils aurōt tenu en la profession de leur office, auquel ils auront bien ou mal versé, & cela se pourra recognoistre par les attestations qu'ils pourront ou deuront auoir retirez des habitans du lieu où ils seront establis, & à faute qu'ilz seroiēt despourueus de ce tesmoignage, ils seroient degradez & priuez de l'honneur de leurs charges, avec deffenses expresses de se presenter iamais pour estre receu en l'administration d'aucun office ou dignité publique.

Or si le Prince est ainsi soigneux de vouloir tout entieremēt sçauoir ce qui se passe en son Royaume, il n'y a point de doute que ses affaires ne succedēt mieux pour son honneur & sa gloire, & pour le bien de tout son estat, d'autant que ceux qui auroient en main le maniement de ses affaires, ne pourroient pas bien aisément le frauder & tromper, comme il se pourroit faire par le contraire.

Ce n'est pas encore tout pour la Monarchie que cela, (cōbien que sous les trois poincts tout ce qui est du gouuernement d'un Royaume soit sommairement compris)

pris,) mais il faut aussi pourvoir à la distribution & au menage des finances, qui ne doit estre mis qu'entre les mains de gens qui seront iugez capable d'une si grande charge, responsable d'une si grande somme, & qui seront reconnus plus zelez au Royaume qu'à leur maison: Et sur tout considerer, bien qu'ils n'aiment pas trop la vanité & la gloire de s'aggrandir, autrement tout ce qu'ils feroient seroit au détriment de l'Estat: C'est à quoy, SIRE, vostre Majesté doit prendre garde, sans que la faueur l'obligeast à passer outre. Combien que ie sçache que ce n'est pas d'aujourd'huy que la faueur a esté desirée & enuiée, & que la prosperité des bons peres de l'Estat n'ait esté calomniée par des esprits extrauagans & phantastiques, qui trouueroient à mordre sur la perfection mesme: Les Annales de tous les Siecles nous monstrent euidentement comme de tout temps on s'est attaqué à ceux qui auoient acquis par la sage prouidence de leur prudente conduite, le maniement des affaires de la France: C'est pourquoy ie ne m'estonne point si on crie si hautement

contre ceux qui ont iusques icy eu le gouvernement des finances: Ioinct aussi qu'il faudroit estre Ange pour estre irreprehensible à ces esprits foibles & malades qui tirent de l'alteratiō de tout , & ne sont iamais contans non pas d'eux-mesmes.

He ie vous prie ! d'où vient ceste estrange metamorphose & ce subit changemēt ? Qui fait qu'en vn moment on void tant d'affaires changées ? D'un soir à vn matin tous les desseins & les conseils sont bouleuersez, & rien ne demeure en l'establissement de son premier estre de ce qui auoit esté proposé. On accuse les Financiers de n'auoir pas bien mesnagé vostre Thresor, & qu'ils en ont esté prodigues en leur endroit, & trop chiches & auares enuers les personnes ausquelles ils debuoiēt equitalement estre distribué, & on ne considere pas l'innombrable despense, à laquelle il leur a falu fournir, & on a veu pourtant qu'ils ont si iustement conduit & cōpassé les reuenus du Domaine, qu'il est impossible de s'acquitter plus fidelement de la charge, qu'ils ont faict, apres auoir monstré qu'ils n'auoient pour but principal

que l'aduancement des Conseils du Roy, la manutention du Royaume, le bien & la conseruation des subjects de la Couronne. Tout se rend pire & semble tourner visage vers l'occidēt de sa gloire, chose calamiteuse & plaine de compassion!

SIRE, ie deplore le mal & la peine que vous auez euë depuis que vous estes Iuste & debonnaire paruenü à la Royauté, & que vous auez succedé à la valeur & generosité du grād Henry dont vous estes le fidelle successeur & heritier de ses graces; car ie scay bien que depuis vous auez autant eu de trauerses que Monarque qui ait iamais esté: Mais aujourd'huy, vostre Majesté peut se rendre tellement absoluë, que les nations mesme les plus esloignées trembleront au bruit de vostre nom, puis-que vostre Magnanimité est assez victorieuse pour se rendre triomphante parmy tout l'Vniuers, laquelle glorieuse peut mettre sous son ioug les peuples mutins.

Quant donc à ce qui est de vos finances, il est tres-aisé, SIRE, d'y trouuer des expedients fort prompts & propres afin de les faire bien employer à vos affaires.

C'est que s'il plaist à vostre Majesté ordonner qu'il y ait vn certain nombre de Financiers, qui n'excederont point ainsi qu'ils sont aujourd'huy, (il est tres-certain qu'ils sont en si grand nombre, qu'avant que vous ayez mil francs purs & nets de vostre Domaine, il faut qu'il y en ait plus de dix mils pour payer & contenter ceux par les mains desquels passent vos finances avant que d'estre dans voz coffres. Lesquelles ne pourront disposer de leur office, ny le vendre, engager, ny resiner, mais qu'ils en jouyssent tant qu'il plaira à vostre Majesté leur permette : Et qu'encore avant qu'entrer en leur charge, il soit fait vn inventaire general de tout leur bien, tant des heritages, meubles, immeubles des successions qui leur pourroient venir, le temps de leur commission, & vn contre-roolle de ce qu'ils auroient augmenté depuis le maniement de voz finances, iusques au iour que vostre Majesté leur en voudroit oster le gouvernement pour le donner à d'autres, & lors selon que vostre Majesté recognoistroit leur bonne versation, elle les recompenseroit sans qu'il

leur fust permis autremēt de s'approprier au moindre bien, avec deffenses qu'ils auroient de ne se seruir point de monopoles ny de secrets, cōtracts pour achapts, prests ou vendition: Et lors, SIRE, si vostre Majesté apres auoir experimenté si ce conseil est bon, & qu'elle le voulut suiure, & qu'il luy pleust commander qu'il fust de poinct en poinct obserué sur peine telle qu'il vous plairoit porter par les deffences, vous verriez certainement que ces trois considerations rendroient l'État de vostre Royaume tellemēt asseuré que vous ne verriez iamais la chambre de vostre thresor sterile ny desgarnie de finances, qui ont esté malheureusement espuisées, & ce lors que vostre Majesté en auoit plus de besoin pour suruenir à l'accomplissement de vos heureux desseins, au contraire vous y auriez tousiours vn nombre de millions de surcrois, qui seroient plus que suffisants de fournir aux despeses extraordinaires, qu'il plairoit à vostre Majesté d'employer, soit pour la guerre, ou bien pour quelque autre entreprise que vostre Majesté auroit desir d'entreprendre.

Or, SIRE, encore n'est-ce pas tout pour la conseruation de vostre Royaume que pouruoir à vos finances, à celle fin qu'elles soient bien mesnagées, deuëment & sagement employées, & espargnées pour reseruer à la necessité, mais il faut ordonner generally à tout le Royaume, & y remedier le plus salutairement qu'il sera possible, car vostre Majesté sçait qu'elle n'a iamais esté bien seruite: mesmement en voz armées dernieres qui n'ont flori comme il eust esté à desirer pour les entretenir en leur gloire: & d'où peut venir ce deffaut sinon de l'allienation de voz finances qui estoient retenuës par voz Thresoriers & Commissaires de Guerres, qui s'en donnoient du bon temps loing du hazard & du danger, pendãt que voz pauvres soldats alloient necessiteux & demy affamez à la boucherie se faire assommer faute de nourriture, qui leur augmentast les forces pour se battre plus courageusement; C'est vn grand deffaut dedans vn Camp depuis que le desordre y regne, & que le payement y manque, car lors chacun cherche ses necessitez, & non pas les

occasions de se combattre, & aussi vostre
 Majesté se doit persuader qu'elle ne sera
 jamais fidelement seruite tandis qu'il y au-
 ra du desordre & de la confusion en vo-
 stre Estat, c'est vne chose du tout impos-
 sible : parce que chacun tirant de son co-
 sté, personne n'est curieux ny soigneux
 de s'employer & remedier à la conserva-
 tion de vostre Royaume, & le vray moyē
 d'empescher ses altercats, est de faire en
 sorte qu'il ny ait point de mescontens qui
 puissent si bien mesler les cartes, que par-
 my ce trouble & ces ambaras, la mutine-
 rie & la sedition s'y glisse, qui pour con-
 tenter les meschants desseins ne face des
 choses plaines d'horreur & de compassiō:
 Or à cette heure pour ne faire point de
 mescontens, c'est d'entretenir chacun en
 bonne intelligence : Et de plus ie supplie
 tres-humblement vostre Majesté de con-
 siderer ce que ie luy vay mettre en auant
 pour la prosperité de vostre Couronne, la
 conseruation de vostre Estat, & le soula-
 gement de tous voz subjects, qui atten-
 dent de vostre Majesté vn amendement
 en toutes voz affaires, auxquelles verita-

blement il ne sera point hors de propos d'y remedier pröptement, afin de destourner l'esclandre & le debris qui la menacēt d'une ruine totale.

La France de tous les Royaumes du monde en est le plus glorieux & triomphant, le plus fertile & florissant, le plus digne & le plus excellent, le plus agreable & le plus abondant, le plus fort, le plus heureux, le plus noble & le plus puissant; pourueu qu'il soit bien sagemēt & prudēment gouuerné, comme il vous est tres-facile, SIRE, vostre Majesté estant environnée d'une infinité de bons Conseillers bien experimentez en ce poinct, de sçauoir bien & heureusemēt gouuerner vne Monarchie, d'autant qu'ils y ont esté nourris & esleuez de tous temps, & que leur sage & iudicieux conseil, aydé de l'experience qu'ils en peuuent auoir, leur fait religieusement obseruer ce qui est de plus vtile pour la conduite d'une republique tant importante, & d'ailleurs vostre Majesté qui aime la Iustice, & qui pour cet effect, c'est legitimemēt acquis le renom de IUSTE, ne permettra iamais que rien se face

se face au prejudice de vostre Estat, ny contre le bien de tous voz subjects, & par ainsi vous vous rendrez le plus absolu Monarque que l'Vniuers ait iamais recogneu, & pour ce faire, ie iuge que trois poincts seroient bien dignes d'estre obseruez.

Le premier, qu'il pleust à vostre Majesté abbattre & razer toutes les fortifications qui sont au milieu de la France, & qui seruent de retraicte à ceux qui n'aymēt que le trouble, & veulent trauerser l'heureux repos & contentement de vostre regne paisible, veu que ces places-là ne vous sont d'aucune consideration pour la conseruation de vostre Royaume, au contraire elles ne vous sont que d'une despense inutile qui seroit ce me semble mieux employée à fortifier les clefs de la France & les villes qui sont sur les frontieres & les passages estrangers, qui sont bien d'une plus grande importance.

Le second, que vostre Majesté ne permist iamais que les seditions s'esleuas-
sent pour allumer vne guerre ciuile, qui

est le vray brandon, qui peut cōsommer
& resoudre en cendre les plus florissan-
tes Empires.

Le troisieme, que le peuple ne fust
point surchargé, que le gouvernement
public ne fust iamais donné à de ieunes
persōnes susceptibles de toutes impres-
sions & persuasions, mais à des gens
rompus aux affaires, & recogneus pour
vrais & fidelles seruiteurs de vostre Ma-
jesté. C'est ce qui pourroit bien favori-
ser l'accomplissement de ces desseins, &
mener à vne heureuse fin tout le mo-
ment de voz iustes conseils : Or en cela
il est tres-veritable que la France a de-
quoy se preualoir au dessus des autres
Royaumes, premierement c'est qu'elle
a vn bon Roy, Iuste & Pieux, seconde-
ment qu'elle est peuplée d'une infinité
de bons esprits qui la tiennent en subsi-
stance esgalle, & de plus c'est la premie-
re & la plus glorieuse Monarchie de
toutes les Monarchies : mais à la verité
si elle estoit destituee de ces bons Con-
seillers, elle en seroit la plus camiteuse ;
Et toutesfois cela ne se peut faire que

prealablemēt les fidels administrateurs
 del'Estat ne feussent empeschez & n'o-
 zassent & ne peussent y remedier aux
 deffauts , estans retenuz par ceux qui
 en tiennent plus absolument les rennes.
 Mais, SIRE, si vous desirez augmenter
 vostre Monarchie, & la remettre en sa
 splendeur luy redonnant le lustre de sa
 gloire, il plaira à vostre Majesté de con-
 siderer qu'il est maintenant plus de be-
 soin que iamais d'y pourvoir soigneuse-
 ment & diligemment, & pour cet effect
 reestablir l'Estat en son premier estre, &
 ne penser pas qu'il se puisse iamais ag-
 grandir par la cruauté des guerres inte-
 stines, ny par les seditions ciuiles, qui ont
 accoustumé d'estre toute la ruine des
 plus heureuses Monarchies: vn Royau-
 me diuisé contre soy-mesme ne peut
 point subsister, mais bien se perdre & se
 destruire, s'entre-arrachent les entrailles
 & puis, SIRE, qu'elle conqueste pour-
 roit-on faire sur ses subjects, qu'elle gloi-
 re d'auoir vaincu ceux que la pieté du
 debuoir vainc sans armes : à la verité
 c'est vne temerité que le subject s'esleue

contre son Prince, & celuy doit estre exemplairement puny qui impudemment oze dresser la pointe de ses armes sanglantes contre le chef sacré de son Roy, mais pour obuier à tout, c'est qu'il faut couper & trancher les racines de la sedition, à celle fin qu'elle ne renaisse iamais au milieu de vostre Estat.

Vous ne débuez pas en cela, SIRE, vous laisser emporter à la persuasion ny au conseil de ceux qui ne demandent que le debris de la France pour croistre en leur particulier par ce deuolissement, ce ne sont que des esprits legers qui n'aiment que le trouble, & qui ne voyent leur aduenement qu'en vostre ruyne mesme. N'est-il pas certain que vostre Majesté diminuë d'autorité & de puissance si elle diminuë de subjects, de reuenus, s'ils diminuent de biens?

Il y a trois choses encores considerables encore auant que d'esmouuoir vne sedition ciuile, & qui doibuent obliger de l'empescher auparauât qu'elle se soit dauantage accreuë: la premiere de remedier promptement aux tumultueux

broüillemens qui sembleroient s'esle-
 uer au commencement de la sedition,
 par la cognoissance qu'on doit prendre
 de toute l'affaire, & en deliberer à l'a-
 miable auant que de venir aux remedes
 extrêmes, & à la seuerité des armes: la
 seconde, qu'on coupe diligemment le
 chemin à la sedition auant qu'elle ait
 d'auantage pris de pied, qu'elles se soit pl⁹
 largement estenduë, y pouruoyans par
 bons conseils & les aduis necessaires
 pour cet effect: la troisieme de n'yzer
 ny de rigueur ny de faueur en l'examen
 de ceux qui sont accusez de troubler le
 repos public, mais y proceder avec la
 mesme iustice, afin que l'equité y inter-
 uenant raisonnablement, puisse remet-
 tre le tout en son premier estat: Non
 qu'il ne soit quelquesfois necessaire de
 chastier les seditieux & rebelles, mais il
 faut bien considerer comment, afin
 qu'on leur face voir qu'avec legitime
 pretexte ou subject de les chastier & pu-
 nir comme mutins & ennemis du salut
 public. Or si la necessité & l'empirement
 des affaires portoit vostre Majesté à la

rigueur de ses armes qu'il luy plaise cō-
 mander qu'il soit mieux par cy - apres
 ordonné de son armée, afin qu'elle en
 soit plus fidèlement seruie, & que tous
 les soldats estāt à l'aduenir mieux payez
 & recompensez ayent plus de courage
 au seruice de vostre Majesté pour l'ac-
 complissement de ses desseins qui reüs-
 sront tousiours à vne heureuse fin ayāt
 de bons & iustes mouuements: Com-
 bien que ie ne vous conseilleray iamais
 de prendre les armes pour amener voz
 subjects à leur obeïssance, s'il se peut fai-
 re d'y aller par vne voye plus douce,
 mais comme absolu Monarque vous
 pouuez vser d'autorité.

F I N.

